

含
經
堂
集

含經堂集卷十八目錄

奏疏二

擬定通鑑講義疏

彙進日講書義疏

辭教習庶吉士疏

自陳辭監修明史疏

修史開館疏

請購明史遺書疏

特舉遺獻錄用史才疏

恭陳明史事宜疏

含經堂集卷十八

崑山徐元文立齋著

奏疏二

擬定通鑑講義疏

題爲欽奉 上諭事臣等直講 內殿面奉

諭旨四書屢經講讀業熟曉大義每觀通鑑備載前代得失深有裨于治道應與四書相叅進講作何摘取撰擬講章爾等議奏欽此仰見

皇上天縱聰明日新學問既采六經之精義復探歷代之史編俾進講筵日得揚扆臣等承奉 綸言不勝忭慶竊按通鑑一書宋臣司馬光所輯舉凡往代治亂

廢興是非得失備著篇籍足垂炯鑒神宗嘉歎獎以序
言賜名資治朱熹因之脩成綱目書法謹嚴褒貶盡善
得春秋之遺旨炳經法于日星臣等竊擬從綱目中詳
加決擇其事之切關君德深裨治理者摘而錄之隨條
暢衍講義體裁難與四書諸經同例應註釋者即於本
文註釋每條之後採取儒先之論參以臆斷之詞演繹
宏綱發揮大義用資講說仰伏質高深俟撰擬數條先錄
呈進請 旨施行

彙進日講書義疏

題爲講義業已彙進歲終循例題明兼陳愚悃仰希
睿鑒竊惟讀書有要非章句之是求爲治無他顧力

行之何若蓋體用務在交脩而始終不容或間我

皇上秉天璽之聰明篤誠志以典學際此逆孽未靖宵
旰殷勞乃經幄日開延論不輟溫綸特渙命脩覆
講之儀光霽下臨曲盡咨諏之道誠百王所莫及實千
古爲美談臣等幸侍起居短長莫效伏稽舊例年終宜
將本年所講書義彙裝進呈今于本年閏五月遵論
先期彙進奉有歲終不必裝潢更進之旨仰見

皇上嚮學孜孜臣等不勝歡躍茲當歲暮理合題明籤
軸方新簡編具在伏祈

聖聰時留省覽以此啓益睿智以此振厲精神以此對
千聖於同堂以此決萬幾於一日將見

聖學時敏聖德日新得之臣工之講論者淺而得之夙
夜之體驗者深得之片言之會悟者微而得之一心之
運用者大此誠臣等塵露之涓末莫能仰益山海之高
深者也無任諄切之至

辭教習庶吉士疏

奏爲謹瀝下情仰祈 睿鑒準停前命事五月初八日
吏部爲請 旨事奉

旨徐元文著教習庶吉士欽此臣一介儒生歷荷 皇
恩簡授內閣學士頃復邀 寵命移掌翰林俾厠講席
高覆厚載莫比恩施踵頂捐糜不知所報茲復蒙教習
之 命臣理宜祇遵盡職自效但有區區下悃不得不

竇宸聽者臣兄編脩秉義雖經授職見與庶吉士同在館讀書臣豈可儼然抗居師席臣衙門將職名咨送吏部時曾開註臣兄在館緣由經部駁回臣續又具揭臣衙門移咨吏部請將臣銜名除扣復經吏部以非例不準頃奉 旨之後又具揭臣衙門咨請吏部代題亦未準允不得已自行竇奏伏祈

皇上鑒臣悃誠準停前命使臣循分不舛撫衷獲安銜誦 皇恩永永無極矣

自陳辭監脩明史疏

奏爲自陳不職仰祈 睿鑒處分事伏見吏部題準康熙十八年京察則例凡應自陳官員丁憂在籍者俱於

到京日即行自陳臣元文丁憂服闋到京例當備開履歷事蹟仰祈 睿鑒竊臣係江南蘇州府崑山縣人年四十六歲中順治十六年一甲進士授翰林院脩撰十八年爲陳明錢糧等事降補鑾儀衛經歷隨據實辨明康熙四年奉 旨復還原職丁父憂服闋八年補國史院脩撰差陝西鄉試正主考本年升秘書院侍讀九年升國子監祭酒十年充 經筵講官十二年三月考察一等稱職十三年五月升內閣學士兼禮部侍郎八月充

太宗實錄副總裁十四年二月捐助烏鎗紀錄四次四月轉翰林院學士仍兼禮部侍郎充 日講起居注官

五月奉 旨教習癸丑庶吉士十二月 恩詔加一級
十五年三月充 殿試讀卷官五月奉 差測驗日食本
月奉 旨教習丙辰庶吉士七月充孝經行義總裁九
月差武會試正主考十月充武 殿試讀卷官十一月
聞母訃回籍守制於康熙十八年二月服滿正起咨赴
補間傳接部文爲纂脩明史事奉

旨徐元文著爲監脩官臣聞 命悚懼隨即啓行于九
月二十八日到京臣一介寒儒夙無似蒙

世祖章皇帝拔置進士第一授官侍從知遇優隆我
皇上加意曲成洵被異數遭逢之幸惟臣最深竊伏自
念臣才非洽雅性本迂疎禁近周旋餘二十載初居詞

館則撰述無能繼泣成均則造士寡效溺職絲綸之地
鰥官翰墨之林至於講殿經幃涓塵莫補

聖學超邁徒仰高深廢祿辜恩自處無地而因緣運會
累荷殊榮循已多慚撫懷增悚前者臣母仰邀 錄卹
泉壤生輝感念鴻施刻肌誓報雖復草土餘命百病互
侵踵頂尚存義無寧處方思力疾就道瞻拜闕庭而
恩命遽來眷顧益厚史局之重畀以監修身未出乎里
閭寵已光夫蓬華職任綦鉅監領須才歷代成規重臣
是委臣學識既淺地望更輕自顧何人乃敢叨冒積愆
藁過固已難追黜幽況昨地震告災

聖心勤惕維新庶政勵飭官常如臣闇庸加復善病豈

宜復塵朝紱再玷禁林伏祈

皇上收還監脩成命立賜處分用戒不職臣之愚分庶
得少安不勝悚息之至

脩史開館疏

題爲題明脩史開館日期并列在事各官仰聞

聖聽事臣等恭承 簡命監總史局念有明史書實關

昭代制作大典敢不竭力從事仰副責成昨於十一

月間內務府於東安門內撥有房屋隨經欽天監選擇日

期擬于本月十七日開館自此日爲始即分曹編輯所有纂

脩各官自薦舉考授翰林諸臣外其原題應用舊詞臣十

六員已經翰林院派出右春坊右庶子盧琦翰林院侍

讀王士禎侍講董訥王鴻緒右春坊右諭德孟亮揆左
春坊左中允李錄子左春坊左贊善陳論翰林院編脩
翁叔元沈涵李應薦李濤檢討李振裕沈上墉徐潮王
尹方李枏相應一體分纂至提調官二員係內閣侍讀學
士王國安翰林院侍讀學士傅臘塔收掌官十員係內
閣撰文中書王作哲辦事中書羅文現蔡珍許曰琮陳正
翰林院待詔阿哈達孔目杜登春筆帖式阿納奇潘世
勲星鼎俱由內閣翰林院遵照前題派送以上各官此
後倘有闕出應仍由內閣翰林院送補不必具題至於
題請本章有事關提調者亦應列提調官銜名可也

請購明史遺書疏

題爲明史方在刊脩謹請專購遺書以資編纂事臣等
伏遇我

皇上天縱聰明勤思典冊有明遺史 特命纂脩固以
一代興亡不容泯滅亦緣千古法戒事合昭垂於 本
朝制作之中實切監夏監殷之意甚盛舉也臣等自惟
才力謏劣學識疎庸自奉 命以來悚息愧汗深懼無
以仰稱任使茲史局已開不敢不竭蹶從事但撰次史
書惟憑載籍今勝國文獻日就湮沒使非廣購遺編安
能討論盡善伏察館閣見存書籍有關明史者甚少而
前經禮部行文各省采取止廣東送書一部其他山東
諸省已經咨覆者直曰無有臣等竊慮在外各官職務

繁冗雖奉行部文等諸故事必不能極力搜採而藏書之家又恡於陳獻稽延日久即使間有呈送不過以尋常見聞之書苟且充數終無裨益其在萬曆以前事蹟雖有實錄等書尚未詳備至啓禎兩朝尤爲闕略若不博訪軼聞第就區區見在篇籍以爲依据則挂漏譌謬勢有必然臣等觀元臣袁桷請脩宋遼金史謂中原諸老家有其書必當搜羅會粹以成信史明初之脩元史也宋濂實主其事今其集中有送呂仲善采史北平一序載同時分遣者十有二人可見購采書籍實史館第一要務臣竊謂宜倣前代成例量遣翰林官分行搜訪舉凡野史雜編名臣狀誌碑碣諸家文集悉遵前者不

拘忌諱之 旨務令所遣官員悉心羅致其藏書之家
許詳計卷帙多寡厚給賞賚或所獻多者量行甄敘若
未刻書籍不願徑獻者官給雇直就其家鈔錄如此則
遺書畢出得以恢廣見聞考析同異而撰著益有所憑
矣至若各省通志府州縣志皆纂輯所必需應請 敕
部行令各省藩司悉上史館若此外更有臣等聽聞所
及知某處有某書緊要可備採擇者許徑知會禮部行
咨轉取庶幾移檄不屬虛文載筆得收實效矣

特舉遺獻錄用史才疏

題爲特舉遺獻請錄史才用佐編輯以光盛典事竊惟
明史之作所以垂示將來采輯綦難筆削非易臣謬荷

簡命委以監脩竊見在局諸臣皆一時妙選彬彬文采綽有可觀苟博購遺書畀之論述分曹削簡豈曰難成顧文獻皆足論世有徵問禮問官必資故老則遺獻之求誠不容已以臣所聞固有諳練舊章通達故典兼劭年德足資訪證者如揚州前明科臣李清耽情典墳等身著述紹興名儒黃宗羲博綜道藝貫穿古今皆當世老成言足徵信但齒登耆耋性癖山林不必寵以官階責之朝謁惟望 敕下所司以禮延致俾來輦下優給廩餼使編纂諸臣得以請質書有成緒則禮而遣之其或老疾不任就道亦令所在有司就家諮訪儻有論著及所見聞悉令錄上史館其所裨益必自弘多又博

學鴻辭經諸臣薦舉

御試之後恩數渚加崇文右儒

千載盛事諸凡未經與試及薦稍後期者俱經部議奉
旨停罷臣何敢瀆陳但其中如原任副使曹溶之著
作鉅手博極羣書候補主事汪懋麟之學識淹通篇章
贍敏布衣黃虞稷監生姜宸英之縱覽弘富思致淵精
實皆才氣不羣通練舊典諸臣論薦良爲得人儻屬以
編摩真足佐成良史惟望特沛 恩旨徵取到館與諸
臣一體分纂或服制未終者聽事畢趨赴多賢薈萃於
盛典益光矣至於教習貢生萬言有良史之識著書之
才行誼文章臣知之最悉并請錄置史館俾載筆從事
凡此諸臣俱俟書成之日同加甄敘紉紉珍藏者非取腋

於一狐拱大廈者必資材於衆木臣受任監領日夕省維不敢蔽賢以負眷委伏惟 慈鑒施行

恭陳明史事宜疏

題爲恭陳明史事宜事臣等奉 命纂脩明史仰惟筆削大典徵信千載所關甚鉅臣等用是酌量體裁博綜故實考訂同異衡別是非撰成紀傳十已六七謹先繕寫本紀七卷列傳十五卷恭呈 御覽所有請 旨事宜謹列於左

一列代史書僅儒臣纂輯獨晉書之成唐太宗稱制論斷凡有四篇史家相傳以爲盛事仰惟

皇上以天縱之才啓斯文之運謨訓垂於雲漢制作炳

乎日星稽古右文度越唐宗萬萬茲有明三百年興
亡治亂之故久垂 睿鑒將以輝煌典誥表裏春秋
定大義之折衷總羣言之會粹非由 聖斷無所知
歸伏冀 賜之制詞增光簡冊不勝大慶
一我

太祖高皇帝肇基王迹當明萬曆之世自是以後
太宗文皇帝奄定上京

世祖章皇帝光宅寓內皇略所布事幾相接而明世史
臣紀載或多失實將欲翦其繁蕪正其矯誣非窺
國史莫定是非乞許恭閱

三朝實錄以便參稽

一明之末造猥多秕政黨事激起朝議紛紜而天啓實錄既非全書崇禎邸鈔實多掛漏文獻漸已難徵野史不無遺舛伏念兩朝是非之實難逃

皇上聖鑒之明擬俟纂擬列傳稿本成日仰請 睿裁惟日月照臨之無遺庶袞鉞褒誅之有賴

一有明之祚訖於愍皇至福唐桂三王遺孽雖在大命已傾然其覆亡之蹟不可以不著也今擬從宋史益衛二王遼史邪律大石之例以愍帝終本紀之篇三王從附傳之列削彼僭偽略存事實既見覆敗之效愈明曆數之歸揆諸體例實爲允合

一歷代革命勝國死事之臣每多記錄是以元紀宋事

則張世傑陸秀夫文天祥謝枋得諸臣並見稱揚明
纂元史則余闕福壽石林宣孫普顏不花之屬殊多
褒美明之臣子或有盡忠所事斯亦考之史例所當
采拾者也以上五條仰祈 睿鑒施行

含經堂集卷十八

含經堂集卷十九目錄

奏疏三

察除逆藩虐政疏

備陳粵東民困疏

備陳閩地民困疏

備陳滇南民困疏

蕩平善後疏

推廣皇仁疏

治安實效疏

含經堂集卷十九

崑山徐元文立齋著

奏疏三

察除叛藩虐政疏

題爲三藩之大害既除萬姓之望恩方切謹分列叛藩虐政請行確察除豁事臣一介陋儒累受

皇上非常眷遇頃復特蒙拔擢俾掌臺綱自顧非材何以堪荷承命感激繼以悚惶敢不竭其愚忱仰荅萬一臣聞利器不可旁假厝火難以久安漢之七國有支屬之親然率至于叛唐之藩鎮不過節度使耳然禍亂相煽終唐之世惟優假之過以至此吾國家分建

三藩實一時權制乃久之怙寵而驕縱恣踰度侈然自大張立私威督撫重臣不敢抗禮自藩司而下匍匐拜趨于庭天下金錢輸入其府以養私卒占買貧口部衆日繁崇樹爪牙廣行姦惡又苛權民財無虐不作煌煌禁令視之蔑如懷叵測之心成坐大之勢真有如賈誼所謂天下方病大瘡失今不治必爲痼疾者

皇上深維久遠默運睿謀念百姓供億之艱難鑒往代養癰之非策于是因其乞請聽許移家而逆賊頓決叛謀曾不返顧一方有急四面皆聳此其聲勢風張異謀素蓄之明驗也幸

皇上天威廟略振古無前戡定羣兇立期清蕩爲

宗社釋無窮之憂爲天下去非常之害海內百姓莫不
鼓舞以望太平而滇南閩粵諸地久被藩害者幸邀曠
蕩其踴躍更倍尋常獨是逆藩雖已翦除而夙日占奪
民利害政干紀之事行之既久竊恐官司營伍或有一
二因襲則閭閻積困終不能一旦豁除甚非

皇上愛念生民之意臣敢以所聞叛藩虐政急應更革
者一方各爲一本仰瀆宸聽伏祈嚴敕各該督撫
詳細察勘切實禁止滇南掃蕩即日奏功要以初定之
辰新恩立沛尤見朝廷德厚昔唐武宗平澤潞詔
自劉從諫以來橫賦悉與蠲除宋太宗平南漢詔僞政
有害於民者并許奏聞除豁

皇上巍巍之功遠過唐宋二主殘疆整頓正在此時臣
是以不憚奏請惟祈 俯鑒施行

備陳粵東民困疏

題爲備陳粵東民困仰祈速議除豁事粵東物產殷繁
舊稱樂土自遭藩下剝奪民不聊生重經變亂師旅騷
騷雖禍患已平而元氣耗索叛藩虐弊不可一日不除
臣敢爲我

皇上陳之一曰鹽埠之害提舉司經管鹽場分行各府
乃藩下將領擇引少戶多之地充商領引高價射利於
是民有貴買之苦其引多戶少難銷處所無人承領大
吏恐累考成勒有司派補於是民有賠引之苦而藩下

豪強則坐享其利請 敕下該撫酌定引戶務令均平
以土民富實者充作埠商不得聽豪強占踞一曰渡稅
之害嶺表澤國非舟不行廣州府屬三百八十餘渡每
渡稅額多者不踰二三兩乃藩下各官假名領票輒遣
兵卒羅據津口橫索渡錢凌侮百端務滿其欲即問渡
多人亦不聽他船分載動盈百千以至沉溺廣民飲恨
殆非一朝請 敕下巡撫責令該府止許土人濟渡不
得聽一兵斂錢犯者處以重罪若營弁縱容有司曲徇
並應議處庶乎民不病涉官私皆便一曰總店之害王
公將軍大臣官員家人霸占要地關津不令商民貿易
者立禁甚重乃廣東省城凡日用纖微之物必有藩下

人開立總店雖經故撫題革無如旋革旋開列肆皆須入稅始聽經營小小負販不出於總店者輒行邀奪官司禁諭漫不一省偶或告發則勢要脅制終莫如何自今宜嚴爲禁絕不令姦人借名壟斷一曰市舶之害西南海洋諸番市舶官收其稅舊額二萬有餘禁海以來一切停罷然荷蘭呂宋諸舶時有至者藩下率赴香山交易利入私家竊以此等舶船與海東寇孽無涉其來泊澳不登陸境民與爲市亦不出洋初無妨于海禁似可聽彼流通香山一澳本屬番民雜處若無專官糾轄恐日久容姦應仍舊制委官遇市舶到澳通詳院司行令提舉會同香山縣如例收稅則瀕海樂業而姦弊不

生矣一曰魚課之害海濱漁人依水爲業苦豪猾侵牟因而投托勢要逆藩委土人謝厥扶管攝漁戶給與守備都司之銜近經變亂遂爲僞水師總兵歸正後譟叛入海幸而被擒其子謝昌今尚縱橫海上始由攘利終成亂階其他高雷各府鎮營兵丁率多擾害漁戶此輩無以資生則竄入逆黨與其驅民爲盜何如化盜爲民應 敕行該撫一應漁船止令河泊所官及州縣管理不許悍兵土棍私立名色侵奪漁利亦詰姦弭亂之一策也此外虐民之事臣所未及知者正多宜令該撫一詳察題請永革伏乞 敕部議覆施行

備陳閩地民困疏

金瓶梅詞話卷之九
題爲備陳閩地民困仰祈速議除豁事閩地負山濱海
素稱輿區自藩兵駐留民生失業威脅鄉谷爲無藝之
征比戶罄懸共銜冤憤今逆藩自取殄滅遺毒餘虐猶
累民間謹一一爲我

皇上陳之一鹽稅之害閩省鹽稅素有定額卽如泉州
薄美塲正供止一千七百餘兩又攤納界外無徵銀一
千餘兩此外初無雜稅耿精忠王進功橫征商民布設
五十餘館所在私抽歲蠹蝕以數十萬計曾經科臣吳
愈聖條奏禁革而積弊因循未除近日張純張房諸土
棍本耿精忠王進功舊商勾誘武弁占踞鹽利脅逼商
人就彼市買立館之弊轉至增加因鹽而旁及鐵杉之

屬因泉而延至興漳各郡擅利已久流毒無窮所當嚴行察禁一報船之害閩省行旅必資舟楫自逆藩入閩造設報船遍據津路比來大兵絡繹有司供應拘集概係民船報船不敢過問以致河道阻絕商旅裹足米穀騰貴民生困苦今逆旣就逮其報船宜歸有司以應急差仍嚴飭駐防將弁及地方官不得私霸舟航插旗號來往民船之困庶少蘇也一冒擾驛夫之害閩省福興漳泉驛夫之苦較之驛馬百倍蓋憑票發夫舊例也逆藩將弁往來大率皆無票勒取且有虐使驛夫箠撻至斃者于是地方官差役所過亦復踵行索勒擾驛之禁最嚴何獨此方受此荼酷宜急爲禁止一牙行渡稅之

害藩兵入閩以來凡牙行渡稅悉被占奪民間知畏藩旗不畏官長今藩下舊旅未盡去閩恐或有尚循夙弊者即不然而見在駐防之兵又將轉取爲利一歸營伍則物價涌騰水陸往來不便宜及今早爲申飭牙行止許本地商人經紀不得夾雜營伍恃強生事渡稅察明禁止是亦便民之一端也至于近年苦累有冒派民夫采買兵米派取草料諸害征斂不貲民膏皆竭伏乞敕下該督撫一切嚴察永禁則自今海疆萬姓皆去湯火而登衽席矣

備陳滇南民困疏

題爲備陳滇南民困仰祈預議除豁事逆賊三桂負恩

煽亂荼毒生民滇南受禍尤酷今大兵過險勢若雷霆
彼中翹首王師如望雲霓救民水火宜亟與更新有應
預救將軍督撫入境之日即爲蠲除即爲規畫者爲我
皇上陳之一勛莊之害故明沐氏世鎮雲南子孫買置
莊產及土司餽奉田連各府皆署置私人苛收籽粒後
經撫按題歸有司徵收移解民以爲便迨 本朝開滇
撥給逆藩壯丁遂致地爲藩莊民爲藩役平時止供其
使令倡亂遂藉爲戎行數年來凡皮鎧縣甲愍不畏死
者多勲莊佃民也以 朝廷田土百姓割充私家致啓
亂萌實由于此竊恐蕩平之後必仍有駐守者利源所
在誰不覬覦乞將此莊產悉歸有司減額徵收不許更

立私莊民色以杜亂源一園田之害私莊之外在雲南
首府更有撥給藩下各官園田名爲無主蒿萊實奪民
間腴產後因軍餉不足又議圈雲澂二府并附近衛所
田地逆藩蓄意不軌初未散兵屯種止責軍民輸租較
舊額加十有餘倍遂使 朝廷受奪人恒產之名而逆
藩陰享有土有人之利今宜將此項圈占田地悉還業
主以布殊恩一礦廠之害滇雖僻遠地產五金逆藩皆
妄官採鑿無論銅鉛悉歸私庫今宜 敕該撫察驗聽
民自行開採銅錫散滿民間公家自得其用不致爲邊
方寇盜之資矣一兵多之害故明沐氏鎮守不過一總
兵官耳在外亦止設衛所指彈防守萬曆以後始加設

叅游一二員 本朝開闢初議設綠旗兵七萬後漸加裁省尚四萬有餘糜餉一百餘萬合之逆藩官兵俸餉則三百萬矣設兵既多征稅愈重于是鹽課加增過半二稅所收四斛始準一石衛所官田科糧重于屯田新設黔西開化各府羣民田地科糧重于內地然猶入不副出仰資外省今蕩平之後不免睿慮者正此兵多餉少之故也臣思明以一總兵駐雲南而無大故者三百年今以數總兵鎮雲南十餘年而亂起則其弊不在兵少可知矣臣謂宜預敕統兵將軍督撫提鎮籌量地形設兵扼險珠聯碁布貴精不貴多可省協濟十之五六其他逆藩一切橫征苛斂槩行詳察蠲除俟地方大定

漸考明制撥田屯種使一省錢糧足供一省兵食軍民胥荷

皇仁荒服永稱帶礪矣

蕩平善後疏

題爲蕩平旦夕奏功善後宜須早計謹摠一得仰請
睿裁事曩者逆賊辜恩干戈是煽三方連綴所在騷然
幸賴廟略周詳大威震疊戡定禍亂收服土疆滇孽
游魂旦夕除翦臣思徵兵籌餉竭頻年之力致討叛臣
天下之大計不得已也若夫逆賊已平而不絕根株雖
復銷兵勞費未已天下之大慮不可不早圖也我
皇上旣深灼于幾先以削除羣逆豈容不熟察于事後

以永奠太平何者逆賊三桂甘心反叛蔑棄天常同惡
之人義宜鋤殛然苟能效順業已恩許自新計彼脅從
必稽服恐後將欲仍留彼土則非永久之規將欲移調
他方則多遷徙之費統之別將則疑情未化終涉危嫌
攝之歸旗則放恣既久猝難檢制臣以爲宜明布恩
旨悉與湔雪應補職者量與換補綠旗職銜願補伍者
量行撥補綠旗闕伍其他一槩散遣爲民分道安插以
臣策之殆有數便叛藩部衆雖皆風蒙國家豢養然既
隸藩旗實自甘桀犬聚而爲之備孰若散而與之忘留
而使之疑孰若化而使之感今加以曠蕩之德必深戴
朝廷之恩回猜畏之衆心成銷弭之至計其便一也同

叛之人雖復縻之不足爲用而旣未解散不得不給以
廩糧耗有用之軍資養無裨之士卒何如卽爲散遣所
省不貲其便二也各藩舊旅本自無多蟻聚蜂合多得
之侵勒奪占今因此處分便可槩從省釋使陷阱之窮
民重作熙時之赤子其便三也賊勢方窮固應有心歸
命然瞻顧未前者首慮王法之當加次亦慮歸旗之非
利今恩加望外必踴躍輸誠天兵所臨可無血刃其便
四也至于以前處置兩藩官兵已有成局臣何敢妄議
第恐亦是一時權宜未必實可資固圉折衝之用而耗
餉不已臣竊慮之倘先行酌量散遣益足使西南餘孽
聞之革心示無外之模垂經久之計事無便于此者論

者必謂藩衆世沐 皇恩用之皆成勁旅豈可一旦委
棄自損富彊之實然 本朝兵力甚盛正復何須此輩
臣以爲得其人之利小而散其黨之利大資其用于一
時之事除而息其費于永遠之事切也至於定南一旅
尤屬無謂似宜一體解散既銷遣藩兵減省餉祿然後
軍儲充裕益可推行寬大之政薄稅輕斂以副
皇上軫念民力之初心矣臣愚鄙書生受恩深厚輒鰓
鰓過計惟 睿斷採擇施行

推廣皇仁疏

題爲大功告成敷天同慶謹推廣

皇仁條列事件仰祈採擇事

皇上神武不世勘大亂而成大功海內歡欣舞躍莫不仰天威之震疊服廟略之淵深而臣愚仰見

皇上之所以建豐功者又不僅在此何也天之所愛民而已矣

皇上除殘討叛凡以爲民乃至一政一令惟民隱是急其有水旱災祲既賑恤之又蠲貸之懇懇勤勤不欲使一夫之不獲是

皇上之心即天地之心也有不足格天而成大業哉頃者捷書一聞即蒙

聖諭令內閣與各部熟議事宜以待德音之沛仰見皇上愛民盛心至深至切夫建非常之績必渙非常之

恩宇內喁喁望澤久矣臣竊仰體 聖恩敷列應行事
件敬塵 睿鑒臣雖愚淺無識而欸欸至誠或有可採
惟祈

皇上特賜留覽所有事件開列于後

一軍興以來秦民餽運獨苦重蒙 聖恩屢加軫恤西
土子遺莫不感悅但大兵大役已踰七年彫敝旣深
瘡痍難起苟非大沛恩澤竊恐積荒必不能開逃戶
必不能復乞 特免秦省康熙二十一年錢糧以示
格外優恤

一雲貴地處天末不幸遭變遂陷賊巢數年以來備罹
荼酷今逆賊殄滅民慶更生計雲貴布政司錢糧不

足當江南一大縣若即督征輸無益軍資徒廢民力
墾闢之計即恐難成宜渙 皇仁特加蠲恤使之一
出湯火即沐雨膏以彰 朝廷至德

一四川雲貴蠻民逼處地瘠民稀近經變亂死徙逃亡
多致田荒戶絕伏察往年有蜀省招民事例緣所定
田數太多起科太急遂至訖無成效今三方甫定諸
投誠流移者正苦無歸宜 敕行督撫不論兵民有
願隸版籍耕種者即撥田立戶寬限起科俾內充國
賦外制土司是亦安邊一策

一隱地漏糧理當察究但有不肖有司止圖紀級即陞
不顧攤賠捏報近又準科臣條奏凡謊報開墾處分

者一切不準抵銷有司畏罪愈甚即護過愈巧經手者必蒙蔽多方新任者必徇情掩飾窮民貽累終無已時今宜 敕各該督撫徹底清察務覈真偽如中有捏報悔罪舉出者免其處分庶有司不冒無功之賞小民不困無產之糧

一各項定稅原有正額自軍興浩繁歷允部議及各官條奏新增雜稅如房田稅契煙酒等項不過爲軍需起見權宜一時原奉有事平即停之 旨今宜盡行停止以信絲綸

一度支告絀皆由糜餉養兵今已奏昇平諸凡將軍提鎮苟非要地自應議撤議裁但裁兵甚難核兵宜急

諸督撫身親地方必能揣勢度形悉心籌畫宜令酌
議題請定奪俾得節餉休兵

一江西遭亂以來人民竄散十八年報闕地丁銀四十
六萬兩奉 旨會議十九年半徵二十年全徵但招
民開墾即十九年之半竭力猶難念實係荒闕之銀
祈恩與寬免至各省十七年舊欠似宜悉與蠲除國
損一分小民蒙利殆不止十分也

一各省駐防旗員原以扞禦地方安輯民生初不許干
預民事近多旗員倚勢橫行或起滅詞訟把持有同
或重放息債準折人口或指捏逃人邀索財賄或縱
放健丁行劫鄉鎮見諸大案者纍纍甚非 朝廷設

兵衛民之意請自將軍以下撥什庫以上 特旨嚴飭儻有違犯嚴加懲處

一自逆賊變亂以來凡被賊地方或驅人爲兵或按戶派餉熒熒小民多遭毒虐固敢抵牾自 天兵電掃幸脫網羅惟恐地方貪污官吏惡棍土豪或借偽職偽劄等情串通嚇詐乞 嚴飭各督撫凡被賊地方有以康熙二十年以前受過偽劄等名色借端告害者槩不許準理庶人心鎮定刁風阻息

一定例侵欺錢糧人犯家產果盡承問官不據實詳豁以致各犯父子夫婦分離者俱定有處分此 聖朝欽恤仁政也嗣準臺臣條奏侵糧限滿不完者始將

妻子入官伏思本犯既坐大辟家產又已盡絕更復沒其妻子幾與叛逆同科實可憐憫況所沒人口除分家子外無過老婦稚童無堪役使請自今本犯已故家產已絕者免其妻子入官庶幾百代以下仰見罪人不孥至意

一近來關稅私弊滋多部頒則例之外十倍苛徵舊定疆界之餘多方搜括以致商賈困累行旅憂疑請再行申禁務令商人實填紅簿以杜侵漁并仍舊例令督撫節制嚴察關靈使得通商惠民永絕苛擾至於潼關正陽二關新添部差搜括更甚道路側目今宜各照新定課額仍責地方官管理

一各直省州縣錢糧多有至四五十萬者少有僅三四千者糧額之多少懸殊則催徵之難易較別縣以十分考成良屬不均請自今分別懲勸凡州縣賦額累十萬者定以完足九分免其叅罰仍行帶徵庶爲允愜至軍興以來有司惟急苛征倍嚴敲撲逃遁荒糧或勒他戶包賠那闕庫帑至假勸輸補項甚且假托部費私行徵派前膏已竭後骨復枯哀哀小民莫可籲懇今宜責成各督撫務令易轍改絃實釐積弊一驛遞錢糧及各項存留錢糧累經裁節官民賠累困不容言宜盡行給復

一崇節儉別等威歷奉 上諭未及究行竊思用度無

制則耗費頗多而民力詘服飾無辨則貴賤淆雜而國體紊請 特旨悉照康熙九年定例遵行

一逃人失叅州縣官遽爾革職於國法則已過在人才則可惜竊謂初次失察宜姑帶降三級二次革職失察之上司官亦當量減處分至若逃人到本家探望父母定例過宿不首其父母即以窩家論流徙按律文有得相容隱之條實足矜憫請自後有探父母者亦照飯舖例十日不首方作窩家

以上通計一十五條緣係開列事件不敢更具貼黃伏祈照鑒施行

求治安實効疏

題爲請因蕩定之成功求治安之實效事茲者逆孽殄滅膚功告成羣生晏寧疆宇大定皆我

皇上睿謨神略決勝萬里以故數年以內諸叛悉平天威所臨如吹槁葉歷考史冊未有若今日之赫濯者普天率土含識之衆莫不歡欣舞躍誦

皇上之至仁大武方且叶應

穹蒼告功

列祖式頒慶典沛發德音慰萬方待澤之民縣億載無疆之曆皇哉唐哉茂以尚矣以臣愚鄙竊願有敷陳于黼座者臣聞益告于帝舜曰儆戒無虞唐太宗平高昌謂魏徵曰朕平天下甚懷危懼古者作易聖人于泰

之方盛即致艱貞之訓而豫豐既濟諸卦垂戒尤切誠以功業大定之後惟此寅惕之一心足以守之也我皇上以天縱之聖加日新之德典學勤政業已度越百王臣愚惟願

皇上于景運方新之會倍切堯咨舜敝之心日慎一日以成保泰之治并乞 申諭大小臣工乘此治定功成相與洗心滌志毗贊聖猷如政體宜講也不妨詳考舊章國用當節也不宜過加綜覈行一事必謀久遠勿徇目前之淺圖爲百姓必留有餘務培國家之元氣至于振綱紀以崇大體核名實以課吏功崇清議以定國是厲廉恥以正人心端教化以固治本抑營競以警官邪

敦節儉以厚風俗正名分以絕姦萌並是當今急務但令熟考詳求必當有益于國總之

皇上敬天愛民用心無所不極諸臣皆當以

皇上之心爲心凡治事庀官務存恪恭震動之意而去因循苟且之習庶幾上下交相策勵以應盛世之昌期太平有道之長將于是乎在臣受恩深重輒進芻言仰惟
慈鑒施行

含經堂集卷十九

含經堂集卷二十目錄

奏疏四

課督撫實績疏

劾福建督臣疏

劾駐防旗員疏

劾鹽臣徇庇疏

據實指奏疏

除兩淮積弊疏

糾候補御史疏

含經堂集卷二十

崑山徐元文立齋著

奏疏四

課督撫實績疏

題爲請課督撫之實績以彰勸懲事竊惟民生之安危
關乎吏治吏治之得失操於督撫我

皇上以安民察吏之事委之督撫誠使爲督撫者實與
民疴癢相關爲之興利除害盡心力之所能爲安有行
之而不效者伏察吏部定例首條即云督撫毫無治理
者該部察審從重治罪可見功令責成惟在拊循百姓
今則令懸而不行督撫聚精會神止求免其誣誤之罰

至于立何條教開何便利招何流移革何敝俗多漠然
度外置之平時督率屬吏亦未常以教養百姓爲急務
小民疾苦多壅上聞此督撫不舉其職之弊也臣謂自
今督撫之優劣當以民生愉戚戶口滋耗爲斷其撫綏
無術之處分依例切實舉行則人皆以吏治爲念矣督
撫封疆大臣一切皆職分所當爲今乃事事悉得議敘
往往結銜尚書增秩一品至于簿書期會之間非有大
故又事事不得免于吏議以賞則濫以罰則密此督撫
功過無準之弊也臣請自後凡有督催捐助察逃墾田
等事僅許紀錄註冊惟教養有方治效顯著方準加銜
增秩而一切小事詿誤並量行寬貸俾得早作夜思圖

其重且大者則不至苟且以塞責矣察吏之道宜莫嚴于藩臬大吏苟督撫能嚴察兩司責成吏治將小吏承風皆能振動乃數年來未見有糾彈藩臬者此督撫察吏不嚴之弊也臣謂藩臬兩司苟有貪污不職督撫不行糾劾者宜以狗庇論罪而藩臬亦令交相覺察不揭報者并議其罰至督撫互糾之例更當嚴行申飭如此則容狗蒙蔽之習可以稍變矣督撫遇事抵銷之外有降級留任者有革職帶罪圖功者大要非係大貪大惡類蒙寬假徒有處分之名不改顯榮之實此督撫心多僥倖之弊也臣以爲嗣後督撫有降級應調及革職者宜即令去官不必輒許留任其有事非得已蒙恩戴降

戴革留任者不必待三年無過自行陳奏宜限以一年
或二年令自陳實迹取 睿裁以定去留如此則督撫
知罰在必行有所畏忌矣至于督撫遷轉雖間有蒙恩
內擢然品級考內無應陞定闕賢者徒心慕闕廷不肖
者惟貪戀爵位勸懲之道似爲未盡自今有數歷有年
賢能卓越堪任內職者作何擢敘宜著一定例以示鼓
勸而才具庸常者應酌量改用勿使貽誤地方如此則
天下督撫誰不洗心滌慮以成察吏安民之治者哉緣
係條陳事理字多逾格伏乞 宸鑒施行

劾福建督臣疏

題爲特參督臣縱恣譎詐妬功害能乞奮 乾斷嚴行

懲治事竊惟人臣之義砥節奉公實心勤事惟其誠而已如或浮夸誕妄變幻譸張媚嫉他人之功掩覆一己之短是爲不誠之尤有不可一日置諸人上者福建總督姚啓聖自爲香山知縣職跡彰聞革職論死幸漏吞舟頃以逆孽變亂予身戎行遂冒軍功去瑕洗垢一二年間驟致節鉞正當殫力竭忠仰報恩遇不謂啓聖素性乖張舉措輕妄以虛詞爲實事以乾沒爲已貲其言欺罔無據其心險側不平臣請略舉數端有大可駭者大臣官員侵占民利煌煌嚴禁而啓聖前者妄請借司庫銀十二萬兩經營取息可駭者一啓聖自陳疏歷敘其貧自稱家無片瓦而以臣所聞啓聖揮霍金錢泥沙

不異即吏部題請加銜疏捐銀共十五萬有奇此十五萬者不從天降地出謂非尅軍餉腴民膏臣不信也可駭者二閩地民困已極啓聖不思加意存撫乃拆毀民居築園亭水閣日役千人舞女歌兒充牣房閨又強取長泰縣鄉紳戴璣孫女爲妾委其兄戴法署行教官事物議騰沸可駭者三海壇進師啓聖力爲阻撓一則曰不敢輕舉喪師辱國一則曰不敢以封疆爲兒戲及恢復海壇繼取金門廈門啓聖又言當直取臺灣其始則欲養寇其繼則又欲窮兵可駭者四啓聖有卒數萬與海澄萬餘之賊相持三載不能成功乃欲令水師提督統新降之衆遠涉波濤以圖萬一之僥倖繼因詞窮理

屈即自請出師漫無布置方略姑爲是語以塞人言可
駭者五吳興祚萬正色平賊奏功啓聖心懷慚妬跪向
侍郎溫代云正色密遣人與僞都督朱天貴約定投誠
隨讓海壇而去其言尤爲不根海壇敗遁之後朱天貴
尚爾狂逞啓聖有疏云廈門雖經恢復水路強項者爲
朱天貴後患實大可慮天貴旣與正色約定何又云後
患可慮乎海壇之捷在正月天貴投誠在五月廣東提
督侯襲爵三月間有疏云天貴率爲真二十餘魁聯踪
狂逞則所云讓去者顯係鑿空妄造臣不知啓聖何心
與驅除海逆者作難如此可駭者六總督封疆大吏乃
因欲行讒譖長跪部臣之前殊失大臣體誼可駭者七

該部據啓聖之言以爲興祚等冒濫軍功是不惟無賞
且應譴斥幸賴

皇上聖明洞見萬里令即行議敘自此勞臣吐氣人心
莫不鼓舞克海賊者既有功則妬功者自應有罪總之
啓聖恣睢放誕險詐欺誣存心行事舉朝共知委以嚴
疆甚非八閩蒼生之福臣謹特疏指叅伏乞

皇上下大奮乾斷敕部確察嚴加議處以爲人臣譎詐行
私者之戒國是一定而紀綱肅然矣爲此具本謹題請
旨

劾駐防旗員疏

題爲駐防旗員虐民毆官巡撫徇情容隱仰請 睿斷

嚴加察懲以昭國憲事我國家分遣八旗官兵駐防要地本以禁暴安民凡膺防守之任者自應恪遵律紀以仰體

皇上軫念元元至意乃不謂有藐翫法度恣欲虐民如浙江副都統高國相者臣聞其恃威狂逞怙勢貪饕虎噬狼殘道路側目惡跡難可勝舉止就杭嚴道王樑揭報巡撫者已足髮指如營伍放債佔奪民房此定例所禁也國相於本年三月間指稱王涵六欠債輒將涵六遠年賣與張軼凡等之米房二十餘間盡發封條佔霸商販驚惶銜冤莫措而國相之他所佔奪又不知凡幾矣擅派民夫此定例所禁也即國家河工兵船等夫

猶給工值國相自到任以來累遣健步徐玉陸瑞等緘
拿轎夫吳成等一二百名當官不給工食甚至勒折送
錢致窮民苦累又用行壩民夫汪彥陳珍等共一千七
百餘名當官而國相之別項擅差民夫又不知凡幾矣
武官干預民詞此定例所禁也本年正月間有建德縣
人姚光鼎因姦殺事告發投旗求救國相輒給告示護
持不容地方官拘審而國相之別縣脅制有司干預民
事又不知凡幾矣臣等職居副都統位尊任鉅不
思守職自效乃恣意縱橫弁髦國典浙地當民力疲困
之餘豈堪受此荼毒巡撫李本晟身駐同城遇此等貪
虐害民之官尚宜訪聞入奏乃旣經杭嚴道王樑列款

申詳竟置不問浙民萬口喧騰沸傳瑩下臣誠不能爲之解也臣又聞本年正月初六日浙江提學道劉霖道經旗營突有旗弁李九思統率多衆遮路辱毆致學臣衣服毀裂徒跣奔籲該撫乃該撫不爲嚴究僅令捕廳一察問而已一時體統掃地人情莫不大駭如此兇橫不早究治恐爲地方隱憂伏祈

皇上大奮乾斷特將高國相貪縱虐民李九思毆官藐法并巡撫溺職徇隱之咎 敕部嚴察議處庶防弁知儆而民生得安矣伏乞 睿鑒施行

劾鹽臣狗庇疏

題爲鹽臣狗庇溺職謹特疏糾叅以肅官方事臣竊惟

巡離各差專用風憲之官原欲其釐弊剔姦振肅綱紀
運使總領一切鹽政而御史監臨督責之同處一城之
內凡事朝夕咨稟御史守正不撓則運使必知顧忌御
史者運使之綱也臣自蒙 恩受任以來深慮各差因
循怠翫曾通行嚴飭尤念兩淮更屬弊薳諄諄誥誡令
其潔已率屬務絕弊端乃昨辦事衙門見江寧撫臣余
國柱特叅兩淮運使羅文瑜揭帖內開劣蹟纍纍婪
數萬暴虐淫蕩靡所不爲而該差御史堪泰若罔聞知
臣弗勝駭異撫臣初到地方蘇楊相隔五百里早已訪
聞劣蹟飛章奏聞乃該御史共事同城任其恣橫曾莫
之省瞻向容庇之罪雖百喙其將奚辯夫鹽臣所專轄

其最親切要重者止有運使一官于此而不察則安所用鹽臣乎臣知撫臣既叅之後該御史聞之必有補叅之疏以自掩飾然亦晚矣終難免于溺職矣臣忝爲臺長不敢不立行糾劾以肅臺綱伏祈

皇上敕部嚴加議處庶此後各差人人儆畏鹺弊得清而官常以肅矣伏祈 睿鑒施行

據實指叅疏

題爲遵 旨據實指叅事前者臣以鹽臣徇庇等事一疏糾劾兩淮巡鹽御史堪泰及該御史回奏到日吏部以無庸議具覆奉

旨這事情徐元文陳奏必有所見著再議具奏仰見

皇上睿照至明茲蒙 允部議令臣指奏臣謹直陳所見并該御史回奏巧飾之謬一一爲

皇上陳之運使羅文瑜贓跡累累經撫臣糾叅以道里論則撫臣駐蘇州去揚州五百里而該御史親與運使同城乃遠者叅而近者不叅以到任論則撫臣下車甫始而該御史按涖數月乃初到者叅而久到者不叅以職掌論撫臣所轄司道員屬甚多而該御史專轄道臣惟此運使一官乃通轄者叅而專轄者不叅此皆徇庇之顯然者臣所以特疏糾劾也至該御史旣聞撫疏必補叅掩飾臣前疏早已道破該御史回奏理宜據實引罪乃更巧爲支飾其徇庇之迹欲掩彌彰如疏內云羅

文瑜先前貪酷情由臣雖有聞因貪穢各款採訪未確未可草率入告夫旣云有聞貪酷之官豈可一日姑縱同在一城採訪立可得實豈新任隔遠之撫臣一訪即確而該御史反難訪確乎又云四月開掣引鹽移署儀真此恐狗庇同城貪官處分較重意欲以不同城爲辭也夫儀揚相去僅三十餘里掣鹽例須親往何以謂之移署况四月赴儀則四月以前已閱半載豈得逃其同城狗庇之罪乎又稱五月二十四日繕疏糾叅巡撫亦於是日拜發實未預知獨不思撫臣拜疏立將羅文瑜摘印看守通國皆知是摘印後補叅明甚如謂不先不後同一日期天下安有如此巧相轅合者將誰欺乎又

云督撫本章用火牌飛騎彼乃自雇長騾所以疏到在後尤爲可怪先經議裁火牌巡鹽御史定給火牌二張原備題叅貪官巨慙等用題載甚明該差火牌係臣衙門領取給發何以如此糾貪大事不行填用而獨云督撫有火牌乎蓋彼若用火牌則其跡難掩不得不雇騾以爲掩覆之地實則雇騾兼程何常不十日可到此甚易明也至疏內又稱親承 上諭不令展限事事挽遲爲速及察該御史從前諸疏或請將課銀循例寬至八月奏銷或請將未行鹽引交新差附銷所謂挽遲爲速者其又安在要之該御史欲掩其徇庇溺職之譽而又增一巧飾欺罔之罪臣終不能爲之寬也臣謹遵 旨

指陳伏祈 睿鑒施行

請除兩淮積弊疏

題爲請除兩淮之積弊以清鹽政事臣竊惟鹺利所入兩淮居天下之半而積弊叢姦亦兩淮獨甚軍興以來衆商罄財急公度支藉以轉餉近者商力已竭屢見逃亡誠爲 國家所當軫恤而乃姦弊多端終莫究詰如撫臣余國柱所叅羅文瑜劣欸可見朘削之害非止一日以臣所聞如過橋過所則有院道使費之弊割沒帶鹽則有割斤補引之弊委任出入則有發收承差之弊藉口公務則有派徵匣費之弊而其弊大槩皆出于商綱商綱原非經制曾經禁革今又變名爲商總不知此

商總將何所用如曰藉以徵課豈官不能徵而商總能之乎其中多有黠詐豪逞之徒與官因緣作姦與承差蟠固交結吸商戶之膏髓供官吏之苞苴公費聽其派徵衆商莫敢違抗以致官解出入蚤夜無常體統蕩然紀綱大壞今莫若立除商總名目而諸弊根株嚴行剷革庶幾鹽政風弊一旦可以清釐伏請

皇上敕下該御史當茲督撫振刷之時會同詳察諸弊勒石永禁此後有犯立置重條務使爲鹽差爲運使者從此去逐羶之心爲任事之心省牟利之念爲奉公之念不至臺班幸其得差而監司指爲美闕將見政體以立人心一新如復陽奉陰違臣即以白簡從事伏祈

敕部確議施行

糾候補御史疏

題爲特糾候補御史蔑禮橫行亟請褫斥究懲以肅臺班事竊惟御史一官居風憲之地有言事之責必律已端嚴而後可以膺斯職任若蔑棄禮經招搖恣肆行止不檢是爲敗類豈可使之姑容一日貶辱臺班臣察得候補御史蕭鳴鳳輕狂無賴稔惡多端居喪而恣狎妓女去官而留戀地方以及生事害民幾同毒蟲臣忝爲臺長苟有所聞不敢不以白簡從事謹臚列鳴鳳事蹟爲我

皇上陳之一鳴鳳先爲真定府衡水知縣時前任王知

縣報水災奉捐錢糧鳴鳳到任全吞入橐恩不及民總
算蕭邦分社書劉衍枝証一衡水縣科斂社書每畝詐
錢一百文每丁銀二錢社書崔調張敬之証一科斂四
十二地方每地方銀三十兩趙長邨方長蘇萬里李士
毛証一指解逃人科斂浪子橋邨銀三百兩斂銀人王
俊甫証一詐馬夫劉鬍子銀二十兩致劉鬍子鬻女本
人証一大盜高二疤子奉提兩次未獲詐馬夫銀二百
兩遂報病故一衡水李捷告賈廷璧追贓銀八百兩入
已不報一鳴鳳丁憂應回旗守制乃仍留戀原任之郡
城先借住魏大學士宅現住柯監生家久不回旗一鳴
鳳指稱知府趙瑾姻戚身住府城徧遊各屬冀州深州

獲鹿諸處攬事說情招搖無忌一鳴鳳正在服制中于
深州狎樂戶賈三妓女大魁兒號文娟嗣往冀州復遣
人至衡水傳喚文娟樂戶知不給銀盡皆藏匿一鳴鳳
在獲鹿縣挾妓琴仙住獲鹿生員張愷甫家一強取木
行柏板欠銀三十兩不還真定木行張西樓証一指真
定府詐崔敬修銀一百五十兩張官舖張玩舞過送一
指真定府打詐崔映碧孫標銀六十兩真定府雷快手
過送此一官者性如饕餮跡類僧馭忘哀而事治遊恃
勢以施壟斷百姓嗟怨衆口沸騰所當亟請

皇上乾斷 敕部嚴行懲處以警官邪而肅臺憲者也
爲此具本謹題請 旨

含經堂集卷二十一

含經堂集卷二十一目錄

奏疏五

酌議捐納官員疏

請停捐納官員保題疏

請入覲藩臬面奏條陳疏

請命提鎮次第入覲疏

請釐捏報隱田疏

嚴禁窩販疏

處分私斃人命疏

釐定服制疏

含經堂集卷二十一

崑山徐元文立齋著

奏疏五

酌議捐納官員疏

題爲治道莫先課吏請就捐納一途酌議成例以甄賢否以澄流品事臣竊見

皇上鼓舞吏治加意澄清特以軍餉浩繁民力彫敝姑準諸臣之議酌開事例權宜濟用然名器旣濫吏道實傷今幸聖化弘敷蕩平立奏誠董正百官與民休息之日臣伏察康熙十八年定例凡捐納授官及捐納復職州縣到任三年後稱職者具題陞轉不稱職者題叅

照例議處其官箴有玷者不時題叅是凡捐納之人無論稱職不稱職皆當以三年爲限分別具題也乃今各督撫具題稱職者尚不乏人而以不稱職題叅概未之見至有受任四五年而不糾不舉莫能辨其賢不肖者謂非督撫之容徇不可也臣以爲督撫於三年之內察各官治行知之當已久熟宜立一定限報滿之日便須分別去留應降應革即行聞奏不得遷延月日姑留不論不議之人以誤民生而滋姦弊至于佐貳教職等官止須咨部彙題所亟宜酌議者也又如戶部條例道府以下捐銀者三年後免其具題照常陞轉夫國家大體所關惟賢不肖之辨而已今吏途甚雜所以令三年

具題蓋欲使賢者勸而不肖者懼若聽許捐銀是金多者可與稱職者同科矣臣以爲稱職非可捐納而得且此曹以現任之官營輸入之計勢必剝民脂而長貪冒所亟宜停止者也歲貢一項所謂正途自捐納事例漸推漸廣而生員俊秀並得輸納嗣又開捐納生員之例雖復目未識丁而今日納生員他日即納歲貢名則清流實多銅臭公然冒濫自謂正途臣以爲正途非可捐納而得其由捐納歲貢得官者仍須保舉方與正途一體陞轉所當亟宜更正者也至于諸凡捐納事例總屬一時彘行

皇上釐敘官方至意固久欲停罷臣願于滇南收復之

日即賜明旨槩輟不行不拘前者十二月停止之成命則聖政一新人心莫不大快矣伏乞宸鑒採擇施行

請停捐納官員保題疏

題爲請停捐納官員三年稱職具題之例以絕夤緣之弊事臣等伏察吏部見行則例捐納官員歷俸三年以稱職具題方準註冊陞轉本欲澄清吏治意非不善但凡州縣官員具題稱職之時必先具文申府由府而歷申各道藩臬以至督撫層次旣多彌縫不易多有美地善闕及逢迎工巧者先得具題稱職苟無力夤緣即置之不論不議所以捐納官員覬圖登薦勢必苛取諸民

以供營辦之用雖間有潔清自愛者亦不能行其志今有司或有三年已滿即以稱職聞者亦或有歷四五六七年方具奏者亦或有已歷數年仍未登啓事者夫督撫身親臨攝其于屬吏至三年之久賢否宜無不得而知也若果循績足取甫歷三年即應如例具題苟或治行無堪亦即應如例論劾乃必俟數年之久方以稱職具題者誠不知其何所待也且大計註考其稱守清才長者一方不過幾人今捐納官員三年具題動曰清廉才能稱職即此可知具文虛飾無益吏治况佐貳教職皆須疏請煩瑣已甚伏察三年大計乃揚清激濁之鉅典嗣後請停捐納官員三年具題之例俟大計之時令

其另行繕冊嚴別賢否送考經過三年大計準留者方聽吏部註冊照常陞轉如此則朝廷澄別流品之具不至爲上官販鬻之資而廉吏可爲生民足寬擾害矣

天折

睿鑒施行

請入覲藩臬面奏條陳疏

題爲藩臬入覲例有條陳請 敕令而奏仰候 睿鑒事竊惟三年大計藩臬兩司並令赴京朝覲蓋以一方之政治于藩臬兩司是寄爲群有司之綱領是以三載考績之期毋論道里遠近俱令趨事闕下固將以閭閻之利病陳之黼座而

皇上因以鑒察其才能爲黜陟進退之地旣明試以功

矣又必敷奏以言此即古者述職之典也舊例藩臬入覲俱許條奏地方事宜但僅得由通政司投遞引見一次辭朝即行于述職之實猶爲未盡茲逢宇內底平之會鉅典復行臣請

皇上特諭各省藩臬朝見之後即將所屬地方應行事宜各具本章面行條奏仰候

皇上親加諮訪聽其敷陳其才具之優劣議論之得失自難逃于奏對之下

皇上知人善任睿照至明從此黜陟進退在

宸衷自有洞鑒而各省藩臬跋涉赴京亦得面陳事理展竭惓誠于

天顏咫尺之間校之封投銀臺尤加親切臣又伏見
皇上慎重用人凡廷推巡撫遇有藩司多蒙馳名與其
臨時赴闕何若即試之于入覲之時况今年大計藩臬
舉卓異者極多

皇上鑒其才能之高下兼可以知督撫所舉之當否于
察吏用人之典似皆不爲無補也伏祈採擇施行

請命提鎮入覲疏

題爲請命提鎮次第入覲以重關寄事自逆賊變叛
皇上神謨默運武功赫濯締造太平命將置帥悉由
宸斷苟建殊勲必蒙異寵凡屬武臣悉皆感奮頃者軍
政舉行

皇上念征守之勞多所弘貸加恩閫外可謂至矣臣等
伏思提鎮職在專閫最爲要重用兵征勦以來提鎮
諸臣有曾著功效者有不與征戰未經立功者有曾經
陞見者有拔自行營歸正效順從未瞻覲者茲當海內
大定之時諸臣身在疆隅諒無不瞻慕朝闕冀覲天
顏臣等竊謂宜令次第入覲苟宿將勞臣勲績素著得
蒙

皇上加寵慰勞益當感激報稱至於其他才具高下亦
可因之鑒別方今時際昇平邊陲寧謐在外武臣或致
日漸弛懈使之一覲闕下親奉指授則時時有
天
威咫尺在其意中必能爭相奮勵爭相警惕所裨於封

守似非小也請 敕兵部酌議施行

請釐捏報隱田疏

題爲請釐捏報隱田之弊以紓民累事向者御史臣劉安國條奏請察隱占田畝部議覆準有察出者分別甄錄乃竟有不肖有司利其升敘或本無主名原非隱占妄造詭戶謬託清釐實則強派分賠取盈敲撲初時追索小民猶或支吾及至頻年不堪困累于是貧瘠小邑漸至逃亡逃者累存而存者復逃名爲加糧實耗糧戶名爲清弊實長弊源爲民父母不能拯民疾苦乃致萬戶顛連以爲一已叨榮之地而軒撫大吏亦硯然與享其榮臣不知何以安此前者府谷縣捏報隱地經接任

知縣何漢英揭部奉 旨遣官察審始得開除洪塘所
千總徐振業虛報隱田經安撫勘察題叅始得分別荒
熟可見妄報虛捏之弊比比有之臣常訪訊而得其實
則更有如山西之蒲縣蒲本瘠邑前令捏報隱田派賠
通邑致兩年來有合里全逃者有一里止存數甲者其
存而未逃者則不免于鬻身賣妻子乃至庠生王命新
曹大朋各賣其子女而廩生賈松年竟自鬻于平陽軍
營夫婦執役士類猶爾小民可知使非有甚不得已之
情何以至此臣又聞山東棲霞縣素係僻小經前令捏
報墾田民受賠累貧瘠愈甚至朝不謀夕失業頗多竊
恐從前所報清察隱地如此二邑者正自不少止緣經

手大吏未必盡謝地方勢須爲之掩覆是以民間愁苦
往往鬱而不伸臣請 敕部通行申飭責成各該督撫
將原報清出隱漏田地細加察核如有虛捏等弊立爲
確勘題豁雖或從前誤報但行檢舉姑與寬原止銷加
紀舊案若始終掩覆壅遏下情嗣被發覺加等科罪如
此則小民不致賠無產之糧而流離可免于國課仍有
賴矣伏乞 睿鑒施行

請嚴窩販疏

題爲請嚴窩販之條并申印賣之禁以杜掠誘根源事
伏察定例凡誘取典賣人口被誘者若不知情將爲首
者擬絞所以禁遏姦民法至善也而惡黨橫行誘賣不

息見諸奏案固已累累其由該部發落者每每不絕然
猶千百之一蓋未發覺者不可勝計矣彼其掠誘之術
幻變百端始猶誘脅窮民今則并及旗人矣始猶誘賣
男婦今則并及幼童矣始猶販售旗下今則遠賣出關
矣哭哭小民蚩蚩赤子一入牢籠任所驅迫本無罪犯
乃至鐵索鎖項百十成羣逼之爲奴又兼遠徙永作不
歸之人長抱沉寃之痛或有獨子孤孫一被掠販竟致
宗祀斷絕我

皇上好生如天於凡有罪流徙之人尚且憐其困苦渙
發德音改烏喇爲尚陽堡改爲奴爲當差之民海內歡
呼戴

聖德之厚以有罪而尚荷矜全豈無辜而忍令顛沛臣
思此等興販誘賣之人其窩頓則有黨其留藏則有地
如前者科臣張鵬所叅朝陽門外夥販結黨誘買江寧
男婦五十八人潛窩王起勝等窩子內及近者該部所
審誘買各案多有招出藏頓東直沙鍋等門外空僻處
所及所謂老虎洞者臣察人販牙子將所賣之人帶到
伊家轉賣或留在別處賣者有枷號鞭責等例今之窩
販罪浮於彼合加等科罪其藏頓之地如所謂窩子老
虎洞者宜飭該汛官兵及該地方官嚴行稽訪有故縱
失察者重加議處至於印買定例經會議題準須賣身
之人親赴凡地方正印官處將願賣口供注冊方準給

與而人心玩愒未見遵守近孟二誘賣一案一人至藏
假印三顆而頃者兵馬司指揮張素仁至預發空印契
一百十紙彭城衛經歷李有泌亦發十紙臣等法司方
在會叅窮究即此可見誘賣之多此惟不遵當堂取供
之例遂至空印假印諸弊雜出販誘之人得行射利之
謀而買人之家反遭誑價之害嗣今地方正印官有不
取本人口供存案妄用印信及非正印官而擅用印者
均宜嚴定處分至若買人之人不帶本人由正印官當
堂驗明掛號即與白契無異如此則人心稍有警惕定
例不爲具文而窮而無告之民不至終罹陷穽即旗下
買人亦得確有實用矣伏祈 敕部施行

請酌定私斃人命處分疏

題爲人命至重私斃可憫請酌定處分以禁苛習而廣生全事臣竊仰見我

皇上愛惜民命無所不極即罪至應死之犯其中稍有可矜猶且加之寬恤必至萬無可生而後已乃尚有無辜之人動輒捐軀殞命十百相繼者則今日之目慘心傷莫甚于各旗之報故人口矣伏察刑部每月將八旗投水自縊人口報聞積計一歲幾及千人其無主尸骸由該旗報部行五城掩埋者其中多係旗人又不在此數夫貪生惡死人之情也凡此之人雖極微賤亦何至忍決絕以死其所以然者必迫于甚不得已蓋旗下之

待奴僕固寬虐不同大要其奴僕甘心赴死者必其主待之無恩使之非道或怨積平日或憤發一時遂致輕生不復返顧甚至有欲行自刎乃先自殺其妻子者聞之尤爲慘痛前者固已累煩諭旨申敕八旗令將奴僕加意愛養而苛習相沿此風未絕恭逢如天好生之聖主更值昇平愷樂之昌時而猶有如此失所之人輕生樂死是亦甚于和氣者矣察刑部雖有故意毆殺奴僕及將家僕責打身死處分之例其餘自盡者不過赴部報明存案縱有毆責逼勒情事無從究詰其中保無有飲恨含冤者臣愚以爲自盡而無傷者猶可曰于主無與也若有傷則必有致傷之由矣一家自盡止一二

人者猶可曰事出偶然也若積至多人則難免寡恩之咎矣伏請 敕部詳議自今旗下家僕自盡其驗有傷痕及一家中前後積至三人者各宜酌定處分庶幾家長稍存顧忌不至妄行苛虐至於無主尸骸身負傷痕者恐有拋移等弊宜責成所在汛地嚴加稽察要使人皆知人命之重則全活者自多所裨於太和之化非淺也伏祈 敕部議覆施行

釐定服制疏

題爲人倫莫先孝行請釐定服制申明禁例以定章程以厚風俗事竊惟父母之恩昊天罔極三年之喪其實不過再朞自練祥以及禫除爲變甚速爲人子者方恨

日月之易邁乃若甫罹大故遽爾公除廢哀戚之情從政事之役人子之心必有大不安者伏察定例八旗漢軍文職官員任漢闕者準其丁憂離任守制任旗闕者不得丁憂或一父之子而兄任漢闕則丁憂弟任旗闕則不丁憂矣或一人之身而先任旗闕則不丁憂後任漢闕則丁憂矣在仁人孝子固有闕然未展之私其或有冒哀求榮者亦復因而自便倫常風化之重寧容互異若此所當亟行定議使之畫一守制滿洲文職官員向來守制三月即出供職後康熙十二年議定滿洲督撫藩臬俱照例守制二十七月夫親喪在所自盡人子至情何限內外亦宜一體丁憂以崇孝道苟職任要重

必若須才可從宜 特旨起復至于滿洲漢軍論旗
分闕候補爲難則請令服闋之官得通融借補此亦所
以導之使興孝也禮云臣有大喪君三年不呼其門律
載官吏丁憂公罪不行勾問蓋不欲奪其喪而妨其哀
也今外官丁憂候代其治理公事無異常日安有方寸
憤亂之時而可責之以政理者聽決而當則爲忘哀哀
苟未忘必至廢事請自今丁憂之官不必候新任接代
但無錢糧舛誤即聽奔喪庶使忘哀罔利之風可以立
變而孝先於有位則士民亦有所觀感臣又詳考律文
凡居喪釋服作樂筵宴嫁娶悉有明禁而邇者士大夫
鮮克由禮或緣經婚娶或喪中聽樂或遲報訃期希圖

繼職或易衣從吉于謁遜既此皆薄俗傷化不可容於
聖世者宜并嚴行申飭令該督撫及言官指叅懲處
夫三年之喪天下之通喪也慎終追遠則民德歸厚茲
者恭逢 盛朝敦崇孝治方釐定禮制移易風俗竊謂
勵實行厚人心其本端在乎此伏祈 敕部議覆施行